

78.06.297.

# G O L U B.

I g r o k a z

v u

chetireh Zpeljavanjih.

Z p i s z a l

*Ljudovit Farkas.*

---

V u Zagrebu,

Pritizkano pri Ferencu Suppanu,

1 8 5 2.

H 109  
109  
109  
*O s z o b e.*

Radbud knez Ztermogorzki.

Ztaniszlava, njegva tovarushica.

Ljudmila, njihova kchi.

Szlavoljub knez Oborgradzki.

Szvojko Radobojzki }  
Boromir Orusinzki      } Vitezi.

Zlobor Magjarevich }

Lomovrat, kluchar pri knezu Ztermogorzkom.

Jela, njegva kchi.

Szlugi. Vojaki.

Chin biva v' Horvatzkom, vu jedenaj-  
ztom ztoletju.



## *Zpeljavanje pervo.*

---

### *Prizor pervi.*

*Szoba vu Oborgradu.*

(*Szlawoljub Oborgradzki i Szvojko Radobojzki,  
ztupe nuter.*)

*Szvojko.*

Chudnovito zaizto mi sze vidi, moj vi-  
teski Gozpone! da sze tak turobno dersi-  
te, kde vendar vasha navada drugach je  
veszelomu biti.

*Szlawoljub.*

Chizto szem sze premenil, prav imash,  
— ali i imam zrok saluvati sze.

*Szvojko.*

Bash mi sze vidi kak da bi sze pri vche-  
rashnjih goztek vsza vasha veszelozt poje-  
la, i popila bila. — Kaj vasz na tuliko  
trapi? —

4

*Szlavoljub.*

Iztina je, vcherashnji i zadnji bojnē  
igre \*) dan jeszu mi mir mojega sivlenja  
vzeli.

*Szvojko.*

O! proszim vasz, onog' dana mi najte  
niti zpomenuti. — Miszlil szem, mech mo-  
jega Szlavoljuba bude chuda chinil; i  
nut! niti jedenput v'red vojujuchih ztu-  
pil ni je.

*Szlavoljub.*

Ne szudi prenaglo, poszluhni, zakaj  
tak dogodilo sze je. — Moje oko, na po-  
gledu vnosine senzkih glav seljno paszec  
sze, zpazishe jednu divojku, koja vu-  
lepoti angel beshe. — Ona, kak chul  
szem, bila je odluchena za razdelenje ce-  
ne harca, — ali najenkrat szudci preme-  
nili szu volju szvoju, i ova dika bila je  
drugi odszudjena. — Zgubil szem vo-  
lju, i niszem vojuval.

*Szvojko.*

Iz toga josh zrok vashega saluvanja ne-  
zpoznavam.

---

\*) Waffenspiel, Turnir.

*Szlavoljub.*

Pitam za njeino ime, i preszenetil-szem sze, — ar chujem, da je Ljudmila kehi kneza Ztermogorzkoga, koj kak znash moj naj vekshi nepriatelj jezt.

*Szvojko.*

Ona, od koje vitezi vchera pri obedu tak vnoga lepa dugovanja povedali szu?

*Szlavoljub.*

Ona je, — ona! viteska divojka! zakaj njein pogled moral je mir szerdca i szrechu sivlenja mojega vzeti? — Szvetuj ztarche! kak nju videti? kak zadobiti budem mogel? moja mora biti, ali ja mertev!

*Szvojko.*

Zpriateljete sze predi z' Radbudom, onda more kaj biti.

*Szlavoljub.*

Jeli shtimash? — ali szerditozt njegva, kak navaden je rechi, proti meni je ne-izbriszljiva.

*Szvojko.*

Obchuvaj Bose! — Morati je zkushati; nebi bilo poshteno chloveku, koj drugoga nikdar zbantuval nije, priateljstvo

zkratiti. — On wasz proszil ne bude, za-to prichmete vi, koj zte mlajshi.

*Szlavoljub.*

Szegurno na tuliko ponizil sze ne bi, ali dobickek je Ljudmila, za nju me-ni nikaj nemoguchno ni je. — Ali kak dojem vu Ztermogoru, kada mi je zkra-tjeno priztupiti? —

*Szvojko.*

Vu opravi putnichki lehko v' grad do-jdemo, i njihovu miszel proti vam zezve-mo. — Vi budete gledeli, da z'Ljudmi-lum govorite, z'tem odidemo. Ako do-bro od wasz miszle, — no onda — szamo mene poshljete tam, i vadljamo sze, da wasz pomirim.

*Szlavoljub (veszelo.)*

Szvojko! ako to szrechno zide, ako Ljudmila bude moja, onda naj lepshi mojeh gradov budi tvoj i tvojeh odvetkov imetek!

*Szvojko.*

Vasha szrecha, bude moja placha. — Verujte meni, da chutenje drugoga szre-che zrok biti, vnogo szlajshe i vugodnej-she zvoni, kak vszi penezi.

### *Szlavoljub.*

Verni ztarche! Znam, da vesz moj imetek, bogatztvu szerdca tvojega niti blizo ne dojde (k'njemu ztupi, i rame mu potreptje) ali zato vendar Szlavoljub nezahvalen ne bude. (odide).

### *Prizor drugi.*

#### *Szvojko szam.*

(za njim gledech.)

Viteskoga szerdca mladenec, chizto razluchen od szvojeh pajdashov, — vnogo tihesjhi, i mirnejshii, kak drugi vezdashnji vitezi. — Da bi njegov otec tak tih, i miren bil, tulike nepriatelje szebi i szvojemu szinu prizkerbel ne bi; — ali naglozt. — Tak, kajti jedenput ljudi kneza Ztermogorkoga na nashu ztran v'lov doshli szu, vsze kopove njihove je dal potuchi; — na to knez Ztermogorzki na tuliko raziljutil sze je, da naj vekshi nepriatelj kneza nashega poztashe; — kaj tulikajshe, dok pokojni sivel je, verno je zpunil, i vezda, kak videti je, nepriateljstvo proti szinu ponavla. — Za szegurno, ako mu Bog mosgjane ne zmekcha, teshko nash poszel dober konec imal bude. — Med-

temtoga zaupajmo sze v'Boga, i ne zdvojmo taki. On je, koj vu szvoji mudrosti vsza ravnna, (odide na levo).

### *Prizor tretji.*

*Boromir Orusinzki, i Szlavoljub Obogradzki, (dojdu.)*

*Boromir.*

Budi veszel moj Szlavoljube, z'turbozajum nikaj ne zadobish! — Hitro k'delu, kaj nakanil szi chiniti, chini; zaizto nikaj-shtentati sze naj, ar Zlobor Magjarevich verno sznubi ztarejshe, da mu Ljudmilu za tovarushicu dadu, i kak basz vezda chulszem, vre njihovo dopushtjenje ima.

*Szlawoljub (chudech sze).*

Jeli moguche? — Kaj to govorish? — To ne more iztina biti! Zlobor meni to ne bi bil zamuchal. — On i ti jezte jedini, koje iztinckie priatelje imenuvati morem.

*Boromir.*

Velim ti, da nad mojim izgovorom dvojiti naj, szegurno znam, da iztina je, kaj govorim.

*Szlavoljub.*

Ha! szram ga budi malovrednjaka!  
znano mu je, da Ljudmilu goruch ljubim.  
Kakti priatelj Radbuda obechal mi je na  
pomoch biti, — i nut! — himbeno pod-  
kapa szrechu moju. Zato hitro k' knezu  
tam, da vkanljivca delo josh vu pochetku  
prever nem.

*Boromir.*

Szamo ne tak naglo, ti zaljubleni chlo-  
veche! Pazi sze, da ljubav tvoja chi-  
zto szlepa ne bude. Iztinzki govorech,  
ova ljubezljivozt je takovo dugovanje,  
koje sze vitezu niti ne priztoji.

*Szlavoljub.*

Szerdce ljubavi vszeydil zaperto, ni-  
kaj chlovechanzkoga vu szebi nema.

*Boromir.*

Zaizto, lepo szudish od mene.

*Szlavoljub.*

Ne prevech zlo, moj Boromire! josh-  
che pravu niszi nashel.

*Boromir.*

Takovu, ako Bog hoche, niti nashel  
ne budem.

*Szlavoljub.*

Tí szi anda glaszovit mus, vekshi josh  
od onog' neizmernoga sen nepriatelja Ar-  
zenia. Bude vendar jedna tebe, kak i  
njega obladala.

*Boromir.*

Nechu sze duse pregovarjati. Nak-  
nenje moje je, sen sze habati; Vu oz-  
talom zaztanovitujem te, da Boromira  
mech vszaki hip pripraven je za Szlavo-  
ljuba mojega vojuvati. (rukiju sze, i odidu  
obodva).

*Prizor cheterti.*

*Szoba vu Ztermogori.*

*Ztanisz lava i Ljudmila (dojdu.)*

*Ztanisz lava (karajuch.)*

Ja pod nikakov nachin terpela ne bu-  
dem, da ti ov cherleni zobunec noszila  
budesh, — ovo nepriztoji sze, — ochive-  
szno znam, da po ovakvi shegi opravu  
nijedna divojka nasheg' plemenitoga po-  
kolenja noszila ni je.

*Ljudmila.*

Draga mati! em niti ja doszada noszi-  
la niszem, ali —

*Ztaniszlava* (v'rech padnuch).

Kaj ali? — To su ztanovito oztanki od zadnje bojne igre; znam da ti sze je koj vitez z'cherlenum szvitum dopal? —

*Ljudmila.*

Zaizto zгадјати jako dobro znate; — kaj budem tajila? — mladi Szlavoljub knez Oborgradzki mi sze je dopal, i kajti njemu cherlena szvita tak lepo ztashe, nakanila szem zkushati, kak sze meni cherlena bόja \*) bi priztojila.

*Ztaniszlava.*

Za vezda jako zlo jeszi zebrala, ar Szlavoljub je nash naj vekshi nepriatelj; njegvo ime pred otcem niti napervodonezti ne szmesh, — i drugach tulikajshe, divojka, koja vre odluchenoga mladenca za tovarusha ima, za drugemi gledeti ne szme.

*Ljudmila.*

Zakaj je nepriatelj? — kajti otec je bil, jeli anda i szin biti mora?

*Ztaniszlava.*

Tak je. Szin odvetek je otchinkzgoga

\*) Farbe.

imena, gerba, \*) imetka, poshtenja, nepo-  
shtenja, z'rechjum, vszega.

*Ljudmila.*

Zato izto proszim vasz, dopuztete mi  
ovo jedino, kaj me na njega zpomina,  
nosziti.

*Ztaniszlava.*

Zakaj ne vgasznesh izkru, koja nikdar  
plamnuti ne szme? — Vu klici mora sze  
tern zkoreniti, da k'drevu zrashtjen orus-  
ju kerchitelja ne szuprotztavi sze.

*Ljudmila (saloztno).*

Ah! Bog vidi tusno szerdce moje! —  
ja Zlobora ljubiti ne morem. — Chutim,  
da ljubav proti Szlavoljubu vu szerdcu mo-  
jem zadushiti ne morem.

*Ztaniszlava.*

Budi zpametna, moje dete. Ne poz-  
nash Szlavoljuba, ne znash jeli te ljubi. —

*Ljudmila.*

O! za szegurno ljubi! — videla szem,  
kak njegvo oko seljno na meni pochivalo  
je, — onak ne gledi mladenec na divoj-  
ku, kojega szerdce goruch ne ljubi.

---

\*) Wappen.

*Ztaniszlava.*

Poztavimo, da te ljubi. Dika i hrabrenozt mora kinchiti onoga, koj tebe zadobiti hoche. Kak mi sze pak vidi, ovaj mladi vitez nima pravu volju mech paszati. Zadnjiput — chuj szamo, velim ti, zadnjiput pri bojni igri niti jedenput vu red vojujucheh ztupiti ni sze podupal. To sze je Zlobor drugach der sal, — on bil je obladavec vszeh.

*Ljudmila.*

Proszim wasz, hrabrenozt Szlavoljuba ne kudete. Pokazal je nju vu dalehnjem orszagu krivovercev, i v' vnogih iztinkih bojeh; — na ovu pako igru orusja zaizto vnogo gledeti ni je.

*Ztaniszlava.*

Ej kak mudra szi ti! — i to najanput vezda. — To pervikrat od tebe chujem, koj igrati ne podupa sze, on vu iztini josh menje valal bude. Za vezda ti pak tuliko povedati morem, da Szlavoljuba oztavi.

*Ljudmila (turobno).*

Tak nikde pomoch? — chizto szem oztavljenia? — vi, ljublena mati pomoze-

te, szmilujte sze nad menum! — (mater ogerlech) Pomozete! ar zaizto zkorom bude keszno!

### *Ztaniszlava*

(zvine sze polahko 'z njeinog' naruchaja.)

Zaupaj sze vu Boga, moja kchi, on pomogel bude. — Szama szi videti mogla, da Zlobora odurjavam, — ali volja mojega Radbuda je nepremnljiva; kaj za te vchiniti morem, zaizto zapuztila ne budem. — (chuje sze vani koracati) Chuj — ide otec tvoj — bolje bude, da te vezda ne vidi, — hodi moja Ljudmila hodi.

(odide turobno na levo.)

### *Prizor peti.*

*Radbud* knez *Ztermogorzki* (dojde szerito, za njim) *Zlobor Magjarevich*.

#### *Zlobor.*

Jeli niszem vam prav povedal? da szu njegvi ljudi.

#### *Radbud.*

Zaizto prav zte povedali; — ali fantiti sze hochu, na moju dushu, ztrashno! — (k'Ztaniszlavi, naglo) kaj ovde delash?

*Ztanisz lava.*

Tebe moj tovarush selela szem videti;  
kaj te szerdi? kaj je? —

*Radbud.*

Sene vsze znati nemoraju! — Bash  
miszlish imam volju, tebi pripovedati.

*Ztanisz lava (k'Zloboru).*

Povedjte vi Zlobor meni, kaj sze je  
dogodilo?

*Zlobor.*

Dobroga szuszeda Szlavoljuba ljudi,  
lepo gozpodarili szu vu dersavi kneza,  
preharili szu dobro pepelare, i nje vu  
vuze odpelali.

*Ztanisz lava.*

To za szegurno od Szlavoljuba ne do-  
hadja, on vszikdar nam dobro hoche.

*Zlobor.*

Jezte chuli vitese?! (szmeje sze) do-  
bra gozpa, vszakoga blisnjega ljubi, i  
brani.

*Radbud.*

Meni sze vidi, da mladi josh gorshi  
bude od ztaroga; — ali z'ovem budem

zkorom gotov. (oshtro k'Ztaniszlavi) Ztaniszlavo! ja selim, da odidesh.

*Ztaniszlava.*

Zdrav budi moj tovarush. (odide).

*Prizor shezti.*

*Radbud knez Ztermogorzki, i Zlobor Magjarevich.*

*Zlobor.*

Rekli zte predi, da z'mladim zkorom budete gotovi, velim vam, da je mla-denec, kojemu med vszemi vitezi para ni je.

*Radbud (gizdavo).*

Miszlim vendor, da Radbud knez Ztermogorzki njega obladal bude! — kaj vi szudite? —

*Zlobor.*

Ni malo ne dvojim. Nego poszla budete imali, dok ga potlachite.

*Radbud.*

Budemmo videli, jeli taj poszel tuliki bude.

### *Zlobor.*

Chujte szada, kaj vam povem. Zadnjiput kad pri Szlavoljubu bil szem, valoval mi je, da vashu kcher ljubi, zato zpriateljiti sze je nakonil z'vami, razmeva sze, dok nju szamo jenput dobi. — Mene je proszil, da ja kakti vu vashi hisi prijet, za njega, kde kaj morem, vu tom poszlu vchinim. Priateljzki anda vasz opominjam, da sze ga chuvajte, ima, kak mi sze vidi, veliku selju za vashim imetkom, koj po kcheri zadobiti upa sze.

### *Radbud.*

Dobro da znam. Vre mu ja volju z'menum ozetiti sze vzemem.

### *Zlobor.*

To szem szi taki miszlil, (prilizavajuch sze) Niti ne shtimam, da tak djedjeren vitez, kakov zte vi, rech szvoju ne bi dersal, nili? — Ljudmila bude moja?

### *Radbud.*

Prez vszake dvojmbe. Vrednejshega viteza za nju ne nahadjam. (ruku mu poda) Josh ove dane budem imal veszelje, vasz mojega szina imenuvati.

*Zlobor (veszelo.)*

Moj otec! — kdo onda vu szrechi meni bude jednak.

*Radbud.*

Dozta od toga, szerditozt moja mene drugam zove, nemir mojeg' gizdavoga szuszeda moram kashtiguвати.

*Zlobor.*

Prav imate, niti naj ménjshe dugovanje prepuztiti sze ne szme, ovi ljudi i onak jeszu jako prevzetni.

*Radbud.*

Za vezda ztanovito dusen mu nechu oztati! (zove chesz vrata) Ivan!

(szluga dojde.)

*Radbud (k'szlugi )*

Naj sze mahom moj konj oszedla, i jeden kup vojakov pripravi. (oshtro) Mahom velim, ov hip budemo odjahali. (szluga odide) Vi moj vitese budete medtemtoga chuvar mojega grada.

*Zlobor (nakloni sz .)*

*Dok sivem.*

*Radbud.*

Na zkorom vidimo sze. (odide.)

*Zlobor.*

Veszeli sze Szlavoljube! dobro idu du-  
govanja. (odide.)

*Prizor szedmi.*

*Szoba kluchara, vu Ztermogori.*

(Od zada pri zidu na ztolu ztoji kerletka, vu  
njoj je golub, *Jela i Ljudmila* mu hranu davaju.)

*Jela* (vodu natochi v'kopanjicu, i v'kerletku  
dene.)

Na, na! pij moj golub, daj ti Bog  
sedju.

*Ljudmila.*

Puzti i mene; ti szi mu pilo dala, ja  
mu moram jelo dati. (da mu.)

*Jela.*

Daj mu szlobodno, daj, morash ga  
k'szebi privuchati; more biti, da ti ga  
bude treba.

*Ljudmila.*

Kak to razmesh? kak mi ga bude tre-  
ba? (zapru kerletku i idu naprej.)

*Jela.*

Lepo. Tvoj Szlavoljub ako k'tebe ne

bude mogel, ovoga goluba mu damo, po njim ti lizteke more poshiljati.

*Ljudmila.*

Kaj to govorish? moja Jela! kdo bi njega navchil lizte nosziti, (turobno) O! Szlavoljube — o! ne zovi mojega, to nikdar ne bude!

*Jela.*

Vuchiti ravno ga ne bude potrebno, ar vre vnogog' lizteka v'szvojem klunu je preneszel, kak mi je otec povedal.

*Ljudmila.*

Zaizto? tak zna? to je lepo. More biti, ah! ali kaj miszlim, — ako vendor haszen bi mu vzeti mogla (veszelo) Szlavoljube! ja chutim, da szrechni budemo!

*Jela.*

O! kak javchesh za njim, a da ti vezda szim dojde, bi sze dala tri vure predi prosziti, nek bi mu szamo rekla, da ga rada vidish.

*Ljudmila.*

To je vre nasha navada. — Gizdozti senzki dopada sze, kada musku glavu pred szobum proszechu, i szebe tak seljno gledechu vidi — jedno malo bi me i

szram bilo ; znam, da niti ti drugach vchnila ne bi.

*Jela.*

Zaizto nebi. To mora naj lepshi hip nashega sivlenja biti, kada tak lepoga mladence goruch ljubechega, pred nami na kolenah vidimo ; onda bi mu sze mahom na vrat hitila, i z'kushci ga zadushila. —

*Ljudmila.*

Glej nju szamo ; kak to govori ? Bi te zkupo prodal , ki te ne bi poznal.

*Jela.*

O , szamo ti muchi. Josh moj golub kreljuti zgubi od guztog' prenashanja liztov.

*Ljudmila.*

Prez vsze shale , ako morebiti vendor bi bilo potrebno , ja miszlim , da sze na te zanezti morem .

*Jela.*

Bi me zaizto zbantuvala , da nad iztinotzjum mojega priateljztva dvojish.

*Ljudmila.*

Znam moja Jela , da me iztinzki ljubish , oprozti , szamo shalila szem sze. Kaj ti veszeloga povedati morem , da mati mo-

ja ljubavi moji proti Szlavoljubu ni je zevszema szuprotivna.

*Jela.*

Z'tem bolje. Dok szamo on szam dojde, vsze sze onda oberne.

*Ljudmila,*

Miszlish da szam dojde? Bi, i ne bi selela, ar je jako nagel moj otec, — bi moglo zlo ziti,

*Jela,*

Da doshel bude, niti ne dvoj. Kaj sze pak otca tvojega dotiche, ne miszlim, da bi sze na tuliko zabil, i njemu kakti goztu szvojemu kaj salnoga vchinil.

(chuje sze Zlobor vani govoriti.)

„Hodte szim Lomovrat, imam sze nekaj szilnoga z'vami zpominjati.“

*Ljudmila.*

Chuj Zlobor ide! vezda idem, zdraya budi moja Jela! (odbesi na ztran.)

*Jela.*

Bog z'tobum!

*Prizor oszmi.*

*Zlobor Magjarevich, i Lomovrat (dojdu.)*

*Lomovrat.*

Kchi moja, kaj mudish? hodi na twoje poszle. Ako kdo za me pital bude, reci, da me ni doma.

*Jela.*

Razmem moj otec. (odide.)

*Lomovrat.*

Vezda szmo szami, kak ztoje vasha dugovanja vitese?

*Zlobor.*

Do szada josh dobro. Lehko mi je bilo za peneze najti ljudi, koji pepelare kneza jeszu jedno malo zklopali; podvuchil szem je na dalje, da ja z' Radbudom dojdem, i kad jednoga zmed njih vlovim, naj valuje, da je szluga kneza Oborgradzkoga. I tak bilo je. — Nakaj, to sze razme, Radbud jako razlutil sze je; ali vendor kak mi miszlili szmo, njemu boj nazveztil ni je. Zato nekaj drugcga zmisszlti moramo.

*Lomovrat.*

Lehko sze kaj najde. (miszli.) — Znam

kaj. Vi odjashete v' Oborgrad, i Szlavoljubu povedjte, da Radbud ni je tak jako, kak szi on miszli, ljut, i ako Szlavoljub k'njemu bi doshel, da bi sze lehko pomisrili. — Morete josh povedati, da ga Ljudmila jako ljubi, i videti seli; onda szegurno znam, da szim dojde. Kada jenput oyde bude, z'Radbudom sze zeztane, onda mu sze Bog szmiluj!

*Zlobor.*

Dobro! viteski! to na nikakov nachin nasz vkaniti ne more. Nego za vezda josh ne bi selel, da sze Szlavoljubu kaj pripeti, razmeva sze, neprilichnoga — na njega bude mochi krivnju hititi. — Em razmete? kaj hochu rechi.

*Lomovrat.*

Hm — razmem — miszlite (malo tihejshe) Radbudu, — kaj ne? szvetju —

*Zlobor* (ogledne sze taho.)

Vgasznuti; — z' Ljudmilum drugach siveti ne morem; da tuliko bogatztvo nima, nikdar za tovarushicu ju jemal ne bi. Onak ako Radbuda ne bude, vu njegoveh gradeh ztanuvati budem mogel, moj bude onda vesz njegov imetek!

*Lomovrat.*

Tak, tak — i toto szi lehko pomorem; — v'iztom boju, ako ne predi kneza 'z szveta zpraviti moremo; do onog, vremena vre nam josh kaj na pamet dojde.

*Zlobor.*

Ztarche! vi budete Bogu rachun davali za zlochine moje, ar vi meni szvetujete; ja nìkaj ne delam, szamo da tolナche vashe zvershavam.

*Lomovrat.*

Dajte szi mir, vezt moja gliboko je zazpala, niti tak hitro zbuditi sze ne more.

*Zlobor.*

I ja szudim, takovoga kaj miszlti je bedazto; chlovek szi pomore, kak more. — Kada nam jenput Radbud ne bude v' putu, onda i Szlavoljuba lehko vugnemo. Njegov i Radbuda imetek — vesz vu moji ruki, ha! kak szvetla i koriztna je to buduchnozt, onda z'nijednim kraljem menjal sze ne bi!

*Lomovrat.*

Szamo zpametno treba je tirati poszle, i szegurno dojdemo k'cilju.

*Zlobor.*

Chizto wasz poszluhnul budem, onda  
miszlim, da pod obrambum takovoga  
meshtra zabludit ne morem.


*Lomovrat.*

Szeda je vre moja glava, ztari szem  
ja malovrednjak. — Nego hodte, hodte  
vezda k' Szlavoljubu, kratko je vreme,  
haszen mu sze vzeti mora.

*Zlobor.*

Ne zkerbite sze. — Z' Bogom.

(odidu na razluchne ztrani.)

*Zaztor opadne.*

## *Zpeljavanje drugo.*

---

### *Prizor pervi.*

Lozovna okolica. Na levo, na jedni pečini vidi sze ztran grada Ztermogorzkoga.

(*Szlavoljub knez Oborgradzki, i Szwojko Radobojzki* dojdu od deszne ztrani, obodva vu putnichki opravi, za njimi vu daljini ide szluga, shishake dva, i kepenjke noszecchi.)

### *Szlavoljub.*

Szamo zpametno moj Marko! prevlechi sze vu lozu na drugi ztrani grada poztavljenu, onde na nasz chakaj; chuvaj sze, da te nikdo ne zpazi. (szluga odide na levo.) Blizo jeszmo meztu nashega cilja. O! kak vugodno je blizo biti onemu meztu, vu kojem ljublena nashega szerdca ztanuje! on izti zrak dihati! z' njum zkupa ztanuvati mochi! mora radozt ne bezka biti! — (gledi na grad.)

*Szvojko.*

**P**olahko! polahko! premiszlete, da sze prepovedati moremo, da vasz kdo vi-di; — z'mirnim szerdcem morate vi iti, vtishete za chasz chutenja vasha.

*Szlavoljub.*

**H**a! kak hoche tvoje za ljubav nechutljivo merzlo szerdce mene podvuchati! ztrah te je, da sze ne bi prepovedali? szlobodno. — Kaj mech moj nimam pri meni? Kaj shtimash, da ja za Ljudmilu vojujuch ztotine obladal ne bi? — Zpraviti hochu vsze szluge i vojake moje, prevernuti grad! z' mechem v' ruki nju zadobiti!

*Szvojko*

**I** od kadecheh ogorkov i podertinj grada, vmorjeneh ztarejsheh, vi njein vmoritelj i zgrabljivec imetka hochete tugujuche dete za tovarushicu pelati?! — Premiszlete! kam vasz je nagla selja odpelala? kaj to govorite?

**Szlavoljub** (preszenetjen poszlusha, gliboko zdehne, i Szvojka za ruku prime.)

**P**rv imash ztarche! niszem bil prav pri szebi, jeli moresh oproziti? moch ljubavi chizto me je prevzela.

*Szvojko.*

Chujte, predi nego idemo; — vugodnoga nikaj ni je, ali znati morate. Denesz v'jutro jeszu pepelari kneza Ztermogorzkoga polovljeni, i premiszlete szamo tu zlocheztochu, oni okrutni tolvaji valuvali szu, da szu od vasz to vchiniti v'putjeni. Morete szi miszlii, da szerditozt Radbuda proti vam josh veksha je.

*Szlavoljub.*

Tak anda josh i to? kada jenput neszrecha mene pregajnati prezthane! — O! Ljudmila! Ljudmila! zmir nove i nove preprechke poztavlaju sze mojemu priblisavanju! zadnjich budesh ti meni nedoztigliva! — kaj bude chiniti?

*Szvojko.*

Miszlim, da od puta, koj szebi napervo vzeli jezte, odztupili ne budete! — Ali zte sze tak jako preztrashili? Zmiszlete sze, kaj Zlobor vam povedal je, da knez Radbud na vasz na tuliko ne ljuti sze, i da pripraven je, vashe priateljztvo prijeti.

*Szlavoljub.*

Iztina, to mi je povedal, zato hitrok'poszlu! Ti Bose! koj dobre chine lju-

bish, budi na pomoch mojemu dobro chiniti selechemu szerdcu. Hodi Szvojko! hodi!

*Szvojko.*

**Idemo vu ime Bose.**

(odidu na levo.)

*Prizor drugi.*

**Szoba vu Ztermogori.**

*Jela i Ljudmila (dojdu.)*

*Jela.*

Veszeli sze! raduj sze! szmej sze! doshel je, doshel! — zaizto Ljudmila, videla szem ga, lep mladenec.

*Ljudmila.*

Kdo je doshel? Jeli ti sze je pamet zmeshala? govori!

*Jela.*

Kdo? — kak moresh tak zpachno pitati? kdo bi doshel? Szlavoljub je doshel.

*Ljudmila (veszelo.)*

Kak to znash? kdo ti je povedal? kde szi ga videla? govori.

*Jela.*

Vezda bila szem vu predvoru, i vide-

la dva putnike dojti, jednoga ztaroga, akoprem i on drug veliku bradu imal je, ali znam da mu nikdar zraszla ni; — mora on biti, szamo nezpoznanljivoga hoche szebe vchiniti.

*Ljudmila.*

Kajti prav ne znash, moja Jela, bolje bi bilo, da nikaj niti povedala ne bi. Szamo za kratki chasz szi me razveszelila, da vezda josh turobnejsha biti moram.

*Jela.*

Ne salozti sze, ako prav znati hochesh, chuj; jeden szluga nash ztari, koj putnike te vidishe, meni povedal je, i zassegural, da Szlavoljuba mahom zpoznashe.

*Ljudmila.*

Ah Jela! kaj bude? kaj 'ztoga zide? jeli ga budem videla? O! moj Szlavoljube! koliko saloztneh hipov jeszi meni zadal! jeli budesh kada moguchi to z'ljubav-jum tvojum meni nadomeztiti?

*Jela.*

Ja chu ga poizkati, i ako priliku najdem, mu prisheptnem, da k'tebi naj dojde, da z'njim govoriti selish.

(hoche odbesati.)

*Ljudmila.*

Ne za volju Bosu! Jela! — ako me i malo rada imash, to ne vchini. Ako szerdece njegovo k'meni szi seli, ztanovito szam priliku izkal bude k'meni dojti. Al zakaj od toga zpominjamo sze, Bog zna, kde je Szlavoljub? i kud sze shetje?

*Jela.*

Dobro kad nechesh, mene kriviti naj, ja pripravna bila szem tebi szlusiti.

*Ljudmila.*

Hvalim ti za to. Vezda idem vu vert, — ni mojem punim perszam ovde zraka, pod biztrim nebom hochu chutenja moja naravi zruchiti.

*Jela.*

Hodi, hodi! razveszeli sze malko.  
(odidu na razluchne ztrane.)

*Prizor tretji.**Palacha v'Ztermogori.*

*Ztanisz lava, Szlavoljub, i Szvojko* (dojdu.)

*Ztanisz lava.*

Szamo nuter moji pobosni ljudi, k'nam vszakomu putniku szlobodno je dojti.

*Szvojko.*

Bog vam plati, dobra gozpa. Ztermogora vre od nekda je prebivalishtje daresljivozti.

*Ztanisz lava.*

Dusnozt bogatejshih je, da ztranzke doztojno primu, i njim podvore. — Ali povedje moji ljudi odkud zte?

*Szvojko.*

Ne dalko od ovud, 'z dersave kneza Szlavoljuba.

(Szlavoljub nemirno na Ztaniszlavu gledi.)

*Ztanisz lava.*

A to je nash szuszed, ne poznam ga, kak chujem od tovarusha mojega, veliki je nash nepriatelj, — i to szamo od njega chujem, ar morem rechi, da drugach povedano mi je, da Szlavoljub je viteski mladenec.

*Szvojko.*

Tuliko znam, da je nash dober gozpon, i da ga vszi ljubimo.

*Ztanisz lava.*

Odperto valujem, da bi selela konec ovoga jala, i nazloba videti.

*Szlavoljub.*

To je tulikajshe jedino Szlavoljuba se-ljenje.

*Szvojko.*

Ali vash tovarush , kak chuti je , nje-ga jako odurjava ?

*Ztaniszlava.*

Zaizto jako , niti ime njegvo ni szmeti napervo donezti , ar taki razljuti sze.

*Szvojko.*

Chudnovito , kak chlovek vu oztalom viteski , szerditozti tak nepravichni ze-vsziema povdati sze more.

*Ztaniszlava.*

I ja to velim ; visheput vre zkushala szem njega vkrotiti , ali do szada mi ni bilo moguche. — Zkorom szem zabila , moji ljudi , jezteli sedjni i lachni ?

*Szvojko.*

Ako tu miloshtju imate , tak proszimo szamo za kupicu vina.

*Ztaniszlava (zove chez vrata.)*

Vina doneszete , za ove pu<sup>t</sup>nike. (dojde nazad) Budete oproztili , da polek navade moja kchi vasz podvorila ne bude , ar ni je gore , dole je vu vertu.

(Szlavoljub nemirno okolo gledi.)

*Szvojko.*

Nikaj zato, sal nam je zadnjich da nemamo szrechu gozpodichnu videti.

(szluga donesze vino.)

*Ztaniszlava.*

Chizto je razluchna, i komaj szebi zpodobna, zmirom salozti sze, i vezda na vertu szedi, i tuguje.

(Szlavoljub da genjenje szvoje zakrije, chashe natache.)

*Szvojko.*

Tak ni je szrechna? kvar, kada tak mlada ztvorenja naj lepshu dobu sivlenja szvojega veszelo vsivati ne moru.

*Ztaniszlava.*

Otec seli, da sze z' Zloborom zaruchi, ona pak njega ne ljubi, nego drugoga.

(Szlavoljuba obraz kase veszelje.)

*Szvojko* (vzeme kupicu.)

Za boljshu szrechu vashe gozpodichne!

(Szlavoljub vszeme chashu i zpije.)

*Ztaniszlava.*

Lepa hvala:

*Szvojko.*

Ne moramo zdvojiti, josh sze vsze na dobro obernuti more.

*Ztaniszlava.*

Nikakvo upanje nimam ; josh ove dane seli moj tovarush.

*Szlavoljub (naglo.)*

Josh ove dane ?

*Ztaniszlava.*

Tak je. Ali pijte moji ljudi, pijte.  
(Szvojko szi natochi, i zpije.) Vi nechete,  
kak vash pajdash ? (Szlavoljub muchech na-  
klopi sze, i zahvali.) Vam pobosnim ljudem  
znam, dopalo bude sze, nashu cirkvicu  
gledeti, lepa je, i vredna, da ju vidite.

*Szvojko.*

Ako tak dobri hochete biti, bude nam  
drago.

*Szlavoljub.*

Oprozite plemenita gozpa, ako z'va-  
mi ishel ne budem; veliki priatelj szem ja  
cvetja, dopuztete, da vu vert iti szmem.

*Ztaniszlava.*

Kak je vasha volja. Tak idemo mi  
dva szami. (Ztaniszlava odide, za njim idu-  
chi Szvojko Szlavoljubu prisheptne.) Szamo  
zpametno, da vasz Radbud ne vlovi.

(odidu.)

## *Prizor cheterti.*

### *Vert vu Ztermogori.*

(*Ljudmila* szedi i jednu cvetuchu rosu premish-ljava. *Kesznejshe* dojde *Szlavoljub.*)

Lepa rosa, kak veszelo cvetesh! kak lep pogled zavdajesh oku chlovechemu! kak vugodna je duha tvoja! mochno vlechesh ljudi k'szebi! — I nut! kak hitro te oztavi, koj prenaglo tebe poprime! Nabode sze na tern tvoj, i ne gledech na lepotu tvoju hitro obraz od tebe odverne, i na te szerdi sze! — O! szrecha chlovechanzka! da tebe ljudi, kada tak lepo njim cvetesh, i vugodna tvoja duha nje ljubezno poziva, tak naglo poprijeli ne bi! — Ar na jedenput kada sze pri cilju biti miszle, na suhke terne neszreche i salozti ztrashno nabodu sze! — Moj Szlavoljube! jeli i z'iami neszrecha tak gorko bavila bude? kada jedenput meni priblival budesh sze? od ovog' saloztnoga ztalsha mene oszlobodil. (*Szlavoljub* dojde polahko, — zkashla sze, *Ljudmila* ogledne, i ztane sze preztrasheno.) Ah! kdo je to!

*Szlavoljub* (naprej dojduch.)

Nikaj sze mene plemenita gozpodichna ne bojte. Zaizto 'z zlocheztoga zroka

szim došel niszem. (hiti bradu i shkerlak.)  
Ja szem Szlavoljub knez Oborgradzki, jedina selja wasz videti, i z'vami govoriti, szim me je dopeljala

*Ljudmila* (zmeshano.)

Oproztete vitese! ja ne szmem z'vami ovde govoriti! — Moja mati i otec to ne dopuzte.

*Szlavoljub.*

Ne zkerbite sze zato, vasha mati z'mojem pajdashem vu cirkvicu je odishla, vash otec pak o ni je doma, anda prez ztraha govoriti moremo. — Ljudmila! Ijubljena Ljudmila! ne znate vi, kakvo chutenje od dneva zadnje bojne igre v'meni zbudili jete! Szamo wasz i zmirom wasz videl szem, nikak kip vash 'zmojega szerdea zbriszati niszem mogel! — V'szerdcu nemiren, k' vam szilil szem, da vam valujem, da wasz Ijubim! neizmerno Ijubim! — (klekne) O! govorete! kaj sze upati morem?! Od wasz viszi szrecha sivlenja mojega! —

*Ljudmila* (zdigne gaszramesljivo.)

Plemeniti vitese ztanete sze! za ime Bo-se! moj otec — ah moj otec —

*Szlavoljub* (ztane sze.)

Ha! tak vszikde Radbud, on vszikde

v'put meni ztati mora, on mora biti zrok  
 moje neszreche?! — Ne vzemite mi vendar upanje, vashu ljubav i kada zadobiti  
 mochi! — Vi muchite? O! proszim wasz  
 govorete! — ali vre ljubite drugoga? —  
 Zlobora? (Ljudmila turobno z'glavum ztresze)  
 Ali miszlite da ja wasz vkaniti hochem?  
 Nad szvetim pepelom mojega otca, chez  
 nevmerteljnozt dushe moje vam priszi-  
 sem, da chizta i szveta k'vam je ljubav  
 moja; da —

*Ljudmila* (v'rech padnuch.)

O! ne preklinajte sze tak ztrashno  
 proszim wasz! (ruke zklopi i k'nebu gledi.)  
 Ti Bose, koj vidish i poznash szerdce mo-  
 je, oprozti! ako volji otca mojega szu-  
 protivno baratala budem! moram szledeti  
 chutjenje, koje meni zaszadil jeszi. (k'Szla-  
 voljbu.) Ljubim wasz vitese! Za wasz na-  
 vek ovo szerdce bije!

(ogerle sze.)

*Szlavoljub.*

Ljudmila! moja Ljudmila! komaj mo-  
 guch szem szrechu moju podnezti!

*Ljudmila.*

Vidish (na cherleni zobunec kazuch.) od  
 kad tebe videla szem, ovo noszim, kajti

i ti moj Szlavoljube onda cherlenu szvitu  
noszil jeszi. (Szvojko dojde i na pol tiko veli)  
**Za volju Bosu besete!** knez Radbud ide.

**Szlawoljub** (ne pazech na to, odpre halju szvitu  
ju, i modru szvitu kese)

Ja pak modru szvitu od onog' vreme-  
na noszim, kajti ti modru boju noszila  
jeszi. (Pri Szlawoljubu zadnjih recheh dojde  
Badbud, i poszlusha, potlam naprej ztupi, za  
njim szluga.)

### *Prizor peti.*

**Radbud knez Ztermogorzki, Szlawojub knez Oborgradzki, Szvojko Radobojzki, Ljudmila, i szluga.**

*Radbud.*

Tak zaizto lepo! Ljudmila z'muskimi  
glavami szama vu vertu? (szerdito.) Kaj  
to znamenuje? kdo szu ovi?!

**Szlawoljub** (z'chaztjum.)

Ja szem Szlawoljub knez Oborgradzki,  
z'vami govoriti bila je selja moja.  
(szleche halju i v'kraj dene palicu.)

*Radbud* (shpotljivo.)

Razmem, razmem. (szlugi vu vuho ne-  
kaj pove.) Odneszi sze malovredna divojka

zpred obraza otchinkog! plachu zaszlu-  
senu zadobish. (z'rukum szerdito zamahne, i  
kase da naj odide. Ljudmila turobno na Szla-  
voljuba gledi, i odide, z'njum szluga.)

*Radbud (szerdito.)*

Prevzetni vi mladenche! kak podztupi-  
lizte sze vu moj grad dojti?! znajte da  
wasz 'z celoga szerdca odurjavam!' (Szvojko  
medtemtoga halju szleche, shkerljak i palieci  
v'kraj dene, szebe na drevo naszloni, i mirno  
poszlusha.)

*Szlavoljub,*

Zaizto vitese vashe pozdravlenje bi me  
moralo preztrashiti, i od nakanenja vam  
proshnju moju napervoztaviti, odvernuti.  
Ali zato vendar vu velikoszerdchenozi vashu  
zaupam sze, Vi odurjavate mene?  
zakaj? — Bog zna! kajti szin jeszem po-  
kognega kneza Oborgradzkoga?

*Radbud (naglo.)*

K'chemu predgovor ov? Ne miszlim  
da zte doshli meni navuke razdeljivat'?  
Da chujem proshnju vashu.

*Szlavoljub,*

Izti ov predgovor k'moji proshni pelja.  
(proszech.) Vitese! pužlete jal vash pro-  
ti meni, zpriateljite sze z'menum. Ako

miszlite, da vam otec moj krivo je vchinil, naplatete sze 'z mojega imetka, radam, kaj potrebuvali budete.

*Radbud (shpotljivo.)*

Zaizto?! kak zpametno zmiszljeno. Hohete mene 'z vashega imetka naplatiti? da potlam njega, kcher moju, i z'njum vsze moje zadobite? kaj ne? — Ljudmila je zrok vashega dohodka, znam.

*Szlavoljub.*

Nikdar niszem navaden bil z'lasjum po szvetu hoditi. Ne tajim, da Ljudmilu ljubim, ali pervo moje nakanenje je z'vami pomiriti sze, potlam zadoblenje Ljudmile naj bi priateljzvo nashe korunilo.

*Radbud.*

Vtishete selju vashu za mojim imetkom, 'z toga nikaj ne bude!

*Szlavoljub.*

Ne hlepis zaizto za vashim imetkom, ar z'vekshem, kak potrebujem, Bog me ne imetkom nadelil je. Ni jednoga, zvan vasz nepriatela nimam, vchinete, da niti vasz ne budem imal.

*Radbud.*

Ne bantujte me z'vašhum proshnjum duse.

(szerdito.) Vkanljivec jezte, nevredni da  
mech yiteza noszite.

*Szlavoljub* (josh mirno )

Plemeniti knese! ako priateljztvo moje  
prijeti nechete, ne szvetujem, da vashega  
nepriatelja me vchinite.

*Radbud.*

Nepriatelja? — (szmeje sze.) Kak da  
vekshi bi mogli biti? Od koga tuliki kvar  
meni dela sze? od vasz. — Vezda doshlo  
je vreme, vezda naplatil budem vsze, vu  
mojeh zte vezda rukah!

*Szlavoljub.*

Kak to razmete? ne miszlim, da od-  
hodek 'z vashega grada meni prechili bu-  
dete?

*Radbud.*

To morem, i budem vchinil. Drugo-  
mu jamu kopajuchi szam opal szi vu nju,

*Szlavoljub.*

Da vi z'menum tak baratati bi mogli,  
niszem szumljil. (ognjeno.) Ali van vasz  
pozivam vitese na szud Bosi! onde mech  
naj dokoncha, kdo ima pravici.

(szleche rukavicu, i njemu hiti.)

*Radbud* (z'nogum rukavicu porinech.)

Szam budem szudil, nikaj od dvojharca!  
pre mladi zte vi za to, vuchete sze  
predi mech voditi; — i onak, szmert od  
moje ruke za vasz preödichena bi bila.

*Szlawoljub.*

Vojuval szem ja! vnogomu krivovercu  
glavu razkolil, zaztava krisa letala je vu  
moji ruki na zidinah Jeruzalema, vnogiput  
vu vruchem harcu tekla je kerv moja!  
— Zato ne ztarajte sze za me, vszikdar  
imam djedjernozt pred szud Bosi z'vami  
iti!

*Radbud.*

Budesh ishel dechak! ali vu vuzu, kde  
meni vishe neprilichen ne budesh! Otec  
tvoj prejak bil je za me, ti niszi, terpi  
za njega.

*Szlawoljub.*

Zkushajte szamo mene zadersati; bude  
te videli, da niszem menje jak od otca  
mojega.

*Radbud.*

Dozta hvalenja twojega, vre mezto za  
te priztojno pripravlja sze.

*Szlawoljub.*

Ako tak je, tak pomozи, kaj pomochi

more; vsze kaj moguche bilo je, zkushal szem. Niti Ljudmila bi mladanca, kojemu poshtenje je vzeto, ljubila! — (zpukne mech.) Szam put szi napravil budem!

*Szvojko* (tulikajshe mech zpukne.)

Vezda ztarche! zkupchi jakozt tvoju, poztani mladenec, szloboshtjina Szlavo-ljuba je vu pogibelji.

*Radbud* (zpukne mech.)

Tak hochesh! ? zaizto zadnji szat ti je zbil! (vojuju. Szvojko hoche Szlavoljubu na pomoch iti, Szlavoljub mu krichi:) Ne dva na jednoga! puzti Szvojko! (vojuju dalje. Dogodi sze Szlavoljubu Radbuda mech 'z ruke zbiti, zatem za persza gaprime, chverzto ga derisi, i Szojku veli:) Szvitu tvoju daj, hitro! (Dá mu szvitu, z'kojum Radbudu ruke zvesu i njega potlam k'jednomu drevu privesu.)

*Radbud* (razlutjen.)

Josh vendar vujti ne moresh, vu ruke dojdesch haharom \*) tvojem!

*Szlavoljub.*

Za to budem ja zkerbel (vzeme mu perzten.) Ovo kakti znamenje nashega pomirenja njim kazal budem, i szegurno me puzte. (odidu.)

---

\*) Henker.

*Prizor shezti.*

**Szoba vu Ztermogori.**

*Zlobor Magjarevich; i Lomovrat (dojdu.)*

*Zlobor.*

Tak zapoved zte dobili za njega vuzu  
priediti? i njega vu nju zapreti.

*Lomovrat.*

**Jeszem.**

*Zlobor.*

Jezteli vre vchinili? jeli je zapert?

*Lomovrat.*

Ni je. Niti kak mi sze vidi ne bude.  
Dozta vremena dal szem mu, mogel je  
lehko oditi, navlash mudim po njega, kak  
mi je zapovedano z'szlugmi iti. Naj ide,  
bolje je za nasz, ako ovd vu vuži zapert  
ne bude. — Vezda ako Szlavoljub vujde,  
Radbud ne bude zamudil njega i vu  
Oborgradu poizkati, onda szi pak lehko  
priliku najdemo.

*Zlobor.*

Ne budeli knez Radbud kaj szumljil,  
ako vezda zamudite Szlavoljuba prijeti?

*Lomovrat.*

Preveliku ima zaupanozt vu mē; lehko mi bude za moje zprichanje kaj najti.

*Zlobor.*

Vezda idem k' Radbudu, na Szlavolju-  
ba ga budem malko düztil. Zutra ako  
Bog da, vnogo pripetiti sze mora.

*Lomovrat.*

Ja idem Szlavoljuba, kojega, znam,  
da ovde ni, lovit.

*Zlobor.*

Puztili zte ga szada, da potlam chver-  
ztejshe ga dersati budemo mogli. — Bog  
z'vami. (odide.)

*Lomovrat.*

I vszikdar z'vami. (ide za njim.)

*Prizor szedmi.**L o z a.*

*Szvojko Radobojzki, Szlavoljub knez Obor-  
gradzki, szluga, kesznjeshe Jela.*

*Szvojko.*

Hvala Bogu! da niszmo vishe med one-  
mi zidinami. Mahom szlobodnejshe dishem.

*Szlavoljub* (dojde turobno, za njim szluga z' shishakmi i kepenjki.)

Ah Ljudmila! moja nepozabljiva Ljudmila! — kak blizo shtimal szem sze tebi biti! i nüt! kak nemiloztivno tverda ruka odluchenja mene od tebe razdrusila je! O tusni ja, i pomiluvanja vredni! kaj bude 'z mene? z'otcem moje Ljudmile tak baratati moral szem! —

*Szvojko.*

Vzememo nashe shishake i kepenjke, surimo sze ovo mezto ozaviti, ni nam zdravo ovde dugo biti. —

(vzemu i pokriju sze.)

*Szlavoljub.*

Kaj szudish Szvojko? jeli drugach baratati mogel szem?

*Szvojko.*

Zaitso nizte. Dersanje vashe chizto vrednozti szerdca zpodobno bilo jezt. Poterpete, josh vsze zevezema zgubljeno ni je.

*Jela* (doderchi.)

Jeli ovde morem najti, kneza Szlavoljuba?

*Szlavoljub.*

Pred tobum ztoji, moje dete. Kaj hochesh?

*Jela.*

Ljudmila gozpodichna moja da vasz  
lepo pozdraviti, i vam poruchiti, da vu  
vuzu je zaperta, ako njoj piszati budeće  
hoteli, lizt meni predajte.

*Szlavoljub.*

Vu vuzi? o! tusna! a ja szloboden?  
Ljudmila vu vuzi?! (ruke ztesuch.) Tak na  
onog' nekrivnoga Angela szvoju pervu  
szerditozt je zlejal! Szvojko pomozi bol  
moju nosziti, ar zaizto pod terhom njei-  
nom peginem! — Nazad moram! nju o-  
szloboditi, ali vumreti! o! kak szlatka bi  
meni szmert bila, da vu njeinom branje-  
nu nju zadobiti morem!

*Jela.*

Proszim vasz, ako i malo gozpodichnu  
Ijubite, tak ovde dugo najte shtentati sze,  
szam knez Radbud za vami nakanil je iti.  
Denesz pred vecherom dojdite szim, ja  
vasz chakala budem, onda mi lizt preda-  
te. Po mojem golubu, koj to dugovanje  
viteski razme, Ljudmili ga poshlem.

*Szlavoljub.*

Hvalim ti lepo dete, vszikak dojdem.

*Jela.*

Zdravi budite,

(odide.)

*Szvojko.*

Vezda hodete! za ime Bose, premislete, da wasz Radbud ovde najde?

*Szlavoljub.*

Prav imash! idemo. Blagoszlov tebi mezto, koje vsze, kaj meni drago je, vu szebi zadersavash! Bog daj, da te zkorom, i vu boljshi szrechi vidim!

(odidu na deszno.)

*Zaztor opadne.*

---

## *Zpeljavanje tretjo.*

---

### *Prizor pervi.*

*L o z a.*

*Szlavoljub* knez *Oborgradzki*, i *Jela* (dojdu)  
(vre poztaje tmichno.)

*Szlavoljub.*

Moje dete oprozti, dugo szi merala  
chakati, to imash, (da lizt.)

*Jela.*

Nikaj zato, dobro zte doshli,  
(vzeme lizt, i zkrije ga.)

*Szlavoljub.*

Vidim nekoga iti; vmekni sze, da te  
ne zpazi.

*Jela.*

Ne bojte sze. Ako drugiput kaj bu-  
dete imali, szamo meni zruchete!

(odbesi.)

*Prizor drugi.*

*Zlobor Magjarevich (dojde.) Szlavoljub.*

*Zlobor.*

Dragi brate! kak veszelim sze tebe jedenput najti; kud hodish?

*Szlavoljub.*

*Zdravo moj Zlobore!*

*Zlobor.*

*Kaj te ovde tak keszno dersi?*

*Szlavoljub.*

Imal szem oszebjujne poszle, moresh  
sem miszlti, kaj me szim vleche.

*Zlobor.*

A znam, znam, vezda tesko kaj zvershish; dohodek v' njeinu vuzu szamo szebi Radbud zadersashe. Chul szem, da szi ga dobro zkopal; viteski szi ti junak, miszlil szem, da tak bude.

*Szlavoljub.*

Moral szem, rajshi kak szebe zapreti dati. Ali kaj vezda, daj tolnach.

*Zlobor.*

Toga ti dati ne morem, niti ne znam,  
nego mech moj, i vszu moju jakozt tebi

aldujem, tebi pomagal budem, dok di-  
shem.

*Szlavoljub.*

Hvalim ti, znam, da mi iztincki do-  
bro selish.

*Zlobor.*

Iz celoga szerdca. Pazi sze Szlavolju-  
be, Radbud pripravla sze, var \*) tvoj ob-  
koliti; zato pashtji sze, da predi nek on  
v' tvojem varu budesh.

*Szlavoljub.*

Dobro da znam, szegurno doztojno  
prijel ga bum.

*Zlobor.*

Na moju pomoch rachunaj. Zaizto  
vreden je taj okorni i nevljudni chlovek,  
da mu kerzno ztepemo.

*Szlavoljub.*

Moresh z' menum iti, ako hochesh;  
selim mu pokazati, da niszem tak szlab,  
kak szi miszli; hodi.

*Zlobor.*

Vezda mahom z' tobum iti ne morem.  
Nazochje moje ovde vu varu tebi vishe  
haszniti more, kak da z' tobum idem. Mo-

\*) Veste. Rech prava szlavzka ne magjarzka.

rebiti priliku bum imal k' Ljudimili dojeti,  
kneza morebiti z' chem zabaviti, da te ne  
zaztigne, ali drugo kaj, chlovek ne zna.

*Szlavoljub.*

Tak oztani. Vchini kaj moresh, vszik-  
dar mene zahvalnoga nashel budesh.

(rukuj u sze Szlavoljub odide na levo.)

*Prizor tretji.*

*Zlobor szam* (za njim gledech.)

Hodi! hodi! ne miszlim da zahvalnozt  
tvoja prevelika bude. Szamo chakaj dok  
ti sze ochi odpru — ha! kak onda v'obla-  
danju mojem budem sze raduval. Kad  
oholne ove dva viteze pogazim — njihov  
prepad naj bude izhod szreche moje. Sza-  
mo josh vezda himbenozt budi mi na po-  
moch! — Zutra ako Bog hoche neprilich-  
nu tvoju zpravu hititi, i mene vu moji  
iztinitozti kazati budem mogel. (gledi na  
deszno) Ide Radbud, i to mu naj bude  
zadnji hod, kojega v' szvojem sivlenju  
hodi.

## *Prizor cheterti.*

*Radbud knez Ztermogorzki, i kup vojakov (dojdu.) Zlobor Magjarevich.*

(Pod ovim prizorom tmichnejshe poztaje, tak da na koncu vre chizto tmica je.)

### *Radbud.*

Kaj vasz ovde dersi? miszlil szem,  
da vi vojake vashe zkupite, i meni na pomoch shetujete, medtemtoga kak vidim,  
ovde mangujete.

### *Zlobor.*

Plemeniti knez moji vojaki za vashu szlusbu pripravni, vasz vre chakaju, i to na krisanju vu lozi blizo Oborgrada. Da ja z' vami ishel ne budem, najte mi zamerniti, pokehđob jedino vam za volju Szlavoljubu priatelja zkazal szem sze, zato ne bi sze priztojilo, da proti njemu vojujem.

### *Radbud.*

Niti to od vasz ne potrebujem, na zkorom ne bude treba vam pred njim sze zatajiti. Moje nakanenje je, vezda k' njemu iti.

### *Zlobor.*

Ali ne vu opravi putnichki v' grad zavlechi sze, kak on k' vam.

*Radbud.*

**Z'** mechem v' ruki budem putuval, kak  
navada vszakog' poshtenoga viteza je! Ztra-  
shnu szvetju ovu noch nasgal mu budem,  
cela okolica naj zna, da Radbud je, koj  
nad nepriateljom szvojem fanti sze; cher-  
lenilo sze naj bude nebo, i vsze budi sert-  
va plamna, szamo podertine njegovoga gra-  
da zorja zut rashna pozdraviti mora!

*Zlobor.*

Daj vam Bog moguchnozt vashe naka-  
nenje zpuniti. Nikaj szlajshe ni je, kak  
vtishenje oszvete.\* Surite sze iti, josh na  
putu njega morebiti vloviti morete, ni je  
duse kak pol szata, kaj od ovud je odishel.

*Radbud (naglo.)*

Kojem putom je ishel? mahom idem  
za njim.

*Zlobor (kase.)*

Ovud je odishel, ja vam szvetujem, da  
vashe vojake ceztum iti pushtjate, vi pa-  
ko ovum ztezum blisnejshem putom iti mo-  
rete. Vashi vojaki naj vasz na krisanju  
chakaju, onde sze njim pridrusiti morete.

*Radbud (k' vojakom.)*

**Kak je recheno.** (vojaki odidu.)

---

\* ) Die Rache.

Vi metemtoga moj verni Zlobore, najte chizto na moju tovarushicu, i vashu zaruchnicu zabiti. Ztari moj Lomovrat szlab je, da bi sze kaj pripetilo, grad niti braniti ne bi mogel. — Zdravi budite, (odide na levo.)

*Zlobor.*

Pazi da ovu noch pre chverzto ne zapish. — (odide na deszno.)

*Prizor peti.*

Loza, na okolo szu pechine, Je noch.

*Szlawoljub* knez *Oborgradzki* (dojde polahko od deszne ztrani, vzeme dole shishak, i pot szi brishe.)

Hvala Bogu! da szem v' moji dersavi, ali jeszemli i vu njoj szloboden? jeli du go ovde szmem szé mutiti? Naj bude. — Narava szvoje potrebuje, njoj chlovek dusen oztati nemore. Prevech preterpel szem denesz, (shishak natla dene, i na kamen szi szedne) vishe ne morem! Dusha i telo je zmucheno! Teslko szerditozt Bosa na meni lesi! — O! da merzlo kak ova pechina bi moglo biti szerdce moje! neszrechu vu celi szvoji jakozti chutil ne bi. Kak z' vekshinum razluchen je izhodek

osznow chlovechanzkih od miszli njihove,  
 zakaj ja to tak suhko zkushati moral szem?  
 Ljudmila! kak ztrashno je to za ljubeche  
 szerdce znati, da predmet szvoje ljubavi  
 nikdar zadobiti ne more. — Boril sze bu-  
 dem, dok puginem, sivlenje i onak ni-  
 kakvu szlaſt za me nima! (chuje sze svenk  
 mechev zatem rech Radbuda „Puztete me malo-  
 vrednjaki, ja szem Radbud knez Ztermogorcki.)“  
 Kaj je to? Radbud? za pomočh krichi!?—  
 (veszelo zkochi i pokrije sze.) Vezda! vezda,  
 naj lepshi szat mojega sivlenja naztal je.  
 Otca moje Ljudmile oszloboditi morem,  
 (zpukne mech.) hitro na njegvu pomoch!

(odide.)

*Prizor shezti.*

(za mali chasz.)

*Radbud* knez Ztermogorcki, i Szlavojub  
 (obodva z golemi mechim dojdu.)

*Radbud.*

Vredni muse kdo zte vi? vam zahvalim  
 sivlenje moje.

*Szalvoljub.*

Po rechi mene lehko zpoznali budete.

*Radbud* (chudech sze.)

Na moju dushu! rech Szalvoljuba.

*Szlavoljub.*

Taj jeszem.

*Radbud.*

Tak i pak vu vashi szem obrazti? kak neposliteno mene vlovili jezte.

*Szlavoljub.*

To ni nakanenje moje bilo. Bog chez szvoje nepresesne pute nasz zkup dopelal je. Imal szem szrechu vashe sivlenje oszloboditi, to do zadnje kaple kervi branil budem.

*Radbud.*

Chudnovito. Z' vami je Bog i njegov blagoszlow. Ja odpravil szem sze na porushenje vashega grada, vojake moje drugim putom pozlal szem, szam blisnejshega szebi zebrajuch, kada najedenput od chetireh momcey popadjen bil szem. Da vasz ne bi bilo, szegurno vishe sivel ne bi.

*Szlavoljub.*

Zato vu vashem nakanenju vasz ne prechim. Idem, vu Oborgradu vasz dochakal budem; ali, da vam menje nepri-like vchinim, ako tak veliku selju za menom imate, ovde szem, vash szem vuznik, (ponudi mu mech.) pelajte me, kam hochete.

*Radbud* (hiti mech i razpre naruchaj.)

Puztite ovakovo govorenje, vi zte mladenec zlatoga szerdca, objemi me, priatelj budes moj! vsze naj bude pozabljeno.

*Szlavoljub* (hiti mech veszelo.)

Jeli moguche? Ah Bose! kak szrechen szem ja. (ogerle sze.)

*Radbud* (zvine sze, obodva zdignu meche, i v' nosnice uje poztave.)

O! kak malo poznal szem dobrotu vashega szerdca. Jeli mi morete oprozititi?

*Szlavoljub.*

Nikaj od toga. Veszeliti sze hochu! szvet bude ov dan meni, v' kojem knez Radbud moj priatelj poztal je.

*Radbud.*

Vezda nimamo vremena ovde duse razgovarjati sze, boljshe je po nochi pod krovom biti, zato zdravi oztanete. — Zutra v' Ztermogori dan nashega priateljzvta doztojno obszlusavali budemo.

*Szlavoljub.*

Ne tak moj knez! Blise jeszmo k'mojemu kak k' vashemu domu, zato priateljno ztupete v' grad moj, kojega malo prede josh vojujuch zadobiti jezte seleli; najte ovu pervu proshnju mi zkratiti.

*Radbud.*

Hochem vam i to vchiniti, idemo, pe-lajte, bolje pute poznate.

*Szlavoljub.*

Szamo jednakov ovum ztezum, za che-tvert szata jeszmo doma. (odidu na levo.)

*Prizor szedmi.*

*Szoba vu Oborgradu.*

*Boromir Orusinzki i Szvojko Radobojzki (dojdu.)*

*Szvojko.*

Veliko zlo, kak znate, szé je dogodilo. Vezda na pomirenje vishe niti ni misziliti.

*Boromir.*

Sziromashki Szlavoljube! kak sałozten bude, milo mi ga je zaipto.

*Szvojko.*

Chizto je zvan szebe. Ako Bog kakvo chudo ne vchini, tak szegurno nashega Szlavoljuba dugo ne bude, vre chizto gine.

*Boromir.*

Ja miszlim, da pri ovom dugovanju Zlobor vnogo je kriv; nikak on chłovek mi k' licu nejde.

*Szvojko.*

Bog je szudec. Ja ne znam, kaj bi od njega miszlil — vszakomu sze priatelja ka-se, shtimam, da nijednomu pravi ni je.

*Boromir.*

Ali kde je Szlavoljub tak dugo? Kaj sze shtenta? keszna je vre noch.

*Szvojko.*

Vre bi mogel dojti, szunce bash v'za-hadjanju beshe, kada je odishel.

*Boromir.*

Ne bi selel, da bi mu sze kaj nepri-lichnoga pripetilo.

*Szvojko.*

Vidite moj Boromire! kak malo dobra ima chlovek v' ovom kratkom sivlenju.

*Boromir.*

Za vszaku szrechnu vuru, koju vsiva-mo, zto neszrechnih preterpimo.

*Szvojko.*

Tak, da ako szrechne i neszrechne zpo-dobite, one mahom pred vnosinum oveh zniknu.

*Boromir.*

Saloztna iztina. — Ali kaj hochemo?

*Szvojko.*

Terpeti. On chlovek szrechno siveti more, koj navchil sze je, dobro i zlo z' jednakim szerdcem podnashati.

*Boromir.*

Ah salozt! da takovih kruto malo je.

*Szvojko.*

Zaizto malo. Moj Szlavoljub je mladenec drugach pameten, i miren; ali vezda, salozt na tuliko predobila ga je, da razumu pri njem niti mezta ni.

*Boromir.*

Neszrechne sene. Jeli zte vredne, da tak oszebjuni mladenec za vasz terpi? — Ovomu zlu, hvala Bogu, do szada, niti kak npam sze, od szada podversen ne budem.

*Szvojko.*

Szrechna ljubav je najvugodnejshe dugovanje. Zaizto ako ljubili nizte; tak veszelje iztinzko ovog' sivlenja ne poznate.

*Boromir (szmeje sze.)*

Dajte mi mir, proszim vasz, nikaj od toga.

*Szvojko.*

Meni je vsze jedno, (chuje sze vani korecati.) vezda ide nash Szlavoljub.  
(idu proti vratam.)

*Prizor oszmi.*

Radbud knez Ztermogorzki i Szlavoljub knez Oborgradzki (dojdu.) Pervejshi. (Szvojko i Boromir chude sze videchi Radbuda.)

*Radbud.*

Budite pozdravljeni vitezi. Jeli sze chudite? da mene ovde vidite.

*Szlavoljub.*

Proszim wasz moj knez zkinete dole shishak, i vchinete, kak da zte doma; (z' Szvojkom i Boromirom rukuje sze.) zdravo! verni priatelji, chudnovita dugovanja od-kad sze videli niszmo, dogodila se jeszu!

*Szvojko.*

Kak vidim, vam chizto povoljna.

*Boromir.*

Veszelim sze 'z szerdca!

*Radbud.*

Bog hotel'je, da sze zpriateljimo. Ne-go josh niti pital niszem, kaj wasz ob oni dobi, vu onu okolicu zaneszlo je?

*Szlavoljub.*

Vam odperto povem. List jeden noszil szem na kcher vashu, vu povratku od vnogoga hoda truden, nakanil szem pochinuti sze.

*Radbud.*

List? na Ljudmilu? onoga zaizto nik-dar v' ruke ne dobi.

*Szlavoljub.*

Zaizto dobi. Kchi vashega kluchara ima goluba, on je nash liztonosz.

*Radbud.*

Ako izte neme ztvari, tvoju ljubav k' njoj pomasu, tak nam tesko sze bude szuprotztaviti.

*Szlavoljub.*

Niti ne miszlim, da sze vishe szuprotztavili budete?

*Radbud.*

A Zlobor Magjarevich? — kaj on k'tomu veli? njemu szem dete moje obechal.

*Szlavoljub.*

Izbila Szvojko? kaj Zlobor josh ni ovd'i bil? obechal je, da dojde.

*Szvojko.*

Z' nijednim okom ga videl niszem.

*Radbud.*

Kaj Zlobor ovde? kak bi to mogu-  
che bilo?

*Szlavoljub.*

Denesz pred vecherom pri vashem gra-  
du z' njím govoril szem, onde meni po-  
moch proti vam obechal je.

*Radbud.*

Zmeshano dugovanje. I meni je po-  
moch proti vam dal, kak sze to szlase?

*Boromir.*

Vu' celom, znachaj \*) Zlobora` nikak  
mi sze ne dopada.

*Szvojko.*

Kak videti je, niti jednomu niti dru-  
gomu dobro ne seli.

*Szlavoljub.*

I ja tak szudim; oyomu dugovanju na  
konec dojti moramo. Shkoda, da jedno-  
ga zmed oneh magarcev, koji vasz v' lozi  
popali jeszu, niszmo vlovili, da bi sze bi-  
lo zeznalo, chiji szu.

*Radbud.*

Kvar zaizto, ali tak pozkakali szu, da  
njim nikde traga ni bilo mochi najti.

\*) Charakter.

*Szlavoljub.*

Zmiszlite sze moj poshtuvani priatelj!  
da Ljudmila je vu vuzi. Zrok njeine ka-  
shtige neztal je, naj i kashtiga neztane.

*Radbud.*

Kak more to biti? Do zutra naj sze  
josh poterpi.

*Szlavoljub.*

Ne budem ja mira imal dok znam, da  
nedusna terpi, najmre ja, koj zrok njei-  
nog' terpljenja jeszem, Dopuztete — ma-  
hom szlugu posheljem, i predi kak zorja  
bude, mora vre szlobodna biti. Dopu-  
ztete! i da nju moju imenuvati szmem!—  
dopuztete!

*Radbud.*

Naj bude, i to vam vchinil budem.

*Szlavoljub.*

O! hvala! ztoput hvala! (oderchi.)

*Szvojko.*

Ljubav njega chizto dechinzkoga je  
vchinila. Radujem sze zaizto 'z celoga  
szerdca plemeniti knez! da ovo dugovanje  
tak obernulo sze je.

*Radbud.*

I ja zevszema zadovoljen jeszem, hva-

lim Boga, da pamet moju razszvetil, i me-  
ne od tak zpachnoga sivlenja oszlobodil je.

*Boromir.*

Zaizto nikaj zpachnejshega, kak veki-  
vechen boj z' szuszedom ne poznam.

*Szlavoljub* (dojde.)

Anda! vezda je vsze gotovo.

*Boromir.*

Ako szi i naj hitrejshega konja szlugi  
tvojemu dal, denesz vendar premudno  
bude ishel.

### *Prizor deveti.*

*Szsluga i Pervejshi.*

*Szsluga* (k' Szlavoljubu.)

Plemeniti knez! jeden kup oklopnikov  
je pred vрати grada.

*Szlavoljub.*

Chiji szu? kaj hocheju?

*Szsluga.*

Vele, da szu kneza Ztermogorzkoga.

*Radbud.*

To szu znam moji, koje za porushenje  
grada vashega z' menum vzel jeszem.

*Szlawoljub.*

Kaj potrebuju?

*Szluga.*

On, koj rech med njimi vodi, veli, da kneza Radbuda dobrovoljno van puztete, ar drugach na grad z' orusjem navalili budu,

*Radbud.*

Povedj njim, da za vezda toga treba ni, i da sze doma naj odnashaju.

*Szlawoljub.*

Ne tak — nego odpri vrata, puzti je nuter, nakermi, i napoji je vsze, naj zapamete dneva, v' kojim njihov gozpon z' menum pomiril sze je.

*Szluga.*

Na szlusbu,

(odide.)

*Radbud.*

Naj bude ova noch njim, zutrashnji pako dan nam za veszelje odluchen.

(chuje sze glasz trubelj.)

*Boromir.*

Chujte! vre idu vu priztroshek. \*)

\*) Vorhof.

*Radbud.*

**Hodmo, i mi!** da je z' nashum nazochnoztjum razveszelimo.

*Szlavoljub.*

**Idemo!** verni szluga vszikdar veszelejshi je, kada zna, da i gozpon njegov rajuje sze.

(odidu vszi.)

**Zaztor opadne.**

## *Zpeljavanje cheterto.*

### *Prizor pervi.*

**Vuza vu Ztermogori.**

(Na ztrani vidi sze oblochec, na kojega *Ljudmila* visheput ogledne sze. *Zlobor Magjarevich.*)

*Zlobor.*

Vezda znajte! viteski Szlavoljub ovu noch vashega otca je vmoril; oszebujno zaizto ztvorenje zte szi zebrali onog' malovrednoga ljudomorca! koj szramota je vszeh vitezev ove okolice.

*Ljudmila* (turobno.)

Ah! ne verujem! ne verujem ja to!  
predi sze techaj narave preobernuti, kak  
on to vchiniti, more.

*Zlobor* (naglo.)

Ne selim, da miszlite, da sze norujem,  
ar niti vremena, niti volju to vchi-

niti imam! Zato ako vam poshtenje va-sheg' otca pokojnoga drago je, zpunete volju njegovu zadnju, — szledete mene k' oltaru, po tom i doztojnejshu priliku dobim Radbuda szmert fantiti.

*Ljudmila.*

Zmosni Bose! nakaj doshla szem; puztete me predi k'materi, onda —

*Zlobor.*

Komaj je szvenulo, i mati vasha josh zpi; kak zakonzki ljudi hochemo zbudechu sze pozdraviti. Vchinete mi to veszelje, hodte — kratko je vreme! —

*Ljudmila (szerdchno.)*

Tak znajte! da sze rajshe szmerti v'shake, kak vam v' ramena zruchiti hochu! Szlavoljuba mojega, dok dusha v'meni je, ljubila budem! ni jedna moch zemeljzka od ovog' nakanenja mene odvernuti ne more!

*Zlobor (shpotljivo.)*

Prazno govorenje. — Budemo videli tu nepreobladavlju divojku. (szerdito.) K' oltaru velim! ali ja vasz pelal budem! — Vu moji jeszi vezda obłazti, i vszi pekli mojem rukam te ne ztergnu!

*Ljudmila* (na oblohec gledech.)

Ah! od nikud pomoch. Zadnje josh kaj imam, naj mi pomore. (zpunkne 'z pod opravum bodesh)\*) Ovo vidish! szlab muse! szmejem sze i poteptavam moch twoju! kak korachaj k' meni vchinish, z' ovem bodeshom szi sivlenje dokoncham.

*Zlobor* (hoche bodesh vzeti.)

Proch z' ovum igratjum.

*Ljudmila* (v' onom hipu ogledne sze na oblohec, tam besi, bodesh natla puzti i jeden lizt vzeme, — veszelo.)

Ha! moj golub! — moj Szlavoljube! (hoche lizt zkriti, Zlobor medtemtoga bodesh vzel je, i vezda k' njoj zkochi.)

*Zlobor.*

Kaj je to? lizt? — szim z' njim! (vzeme ga z' szilum, odpre, i chteje:) „Ljubljena Ljudmila! — Po volji Bosanzki dogdilo mi sze je, qyu noch sivlenje twojega otca obchuvati, kaj konec nashemu nepriateljztyu vchinilo je. Zutra kak zorja bude, vu tvoja hitel\*\*) budem ramena. Onda budesh moja za nayek! Duh na-

\*) Dolph,

\*\*) eisen.

she ljubavi budi z' tobum. — Tvoj verni Szlavoljub.“ — Prokleto ! — mochi tmice kaj oztavile zte mene ? (hiti cedulju szerdito) Vezda k' oltaru velim ! zadnje je vreme ! ar na moju dushu ztrashno z' tobum bavil budem !

### *Ljudmila.*

Zakaj dohodek mojega otca dochakati nechete ? ako on szuprotiven ni , onda mirno idem z' vami .

### *Prizor drugi.*

*Lomovrat* (chizto preztrasheno van doderchi )

Za volju Bosu ! vre idu ! — vre szu chizto blizu — ovde , — taki v' grad dojdu !

### *Zlobor.*

Kdo ? — Radbud ? — Szlavoljub ? —

### *Lomovrat.*

Je , je , i cela cheta oklopnikov i vitezev z' njimi !

### *Zlobor.*

Nikaj muditi nimamo . Zapreti daj ztarche vrata ! naj sze priprave vojaki , koji szu ovde , sivi grad ne predamo !

*Lomovrat.*

**Bose!** kak sze bude to dokonchalo.

(*edide.*)

*Zlobor (oshtro.)*

Jeli sze budesh genula jedenput? pre-di nego bude moguche njim tebe oszlobodi, vsze muke, koje szerditozt chloveka zmiszliti more, tebi chutiti budem dal! (chuje sze larma i shtropot orusja.) Odnashaj sze! vre szerditozt moja medje nima!

(*nemilostivno nju prime, i vleche.*)

*Ljudmila* (na kolena opadne, ruke zklopi, i proti nebu gledi.)

O! ti vsza moguchi **Bose!** — ti branitelj nekrivnozti, ne oztavi niti mene vu ovi suhki vuri, ne daj mene aldov biti ovomu kervolochnomu chloveku!

(*buka ide vsze blise.*)

*Zlobor.*

Dozta pobosnozti! — Bog chuda chinil ne bude! (prime nju i dalje vleche, v'onom hipu dojde Szlavoljub z' golim mechem, Zlobor Ljudmilu na ztran porine, koja omegljena na klup opadne.)

### *Prizor tretji.*

*Szlavoljub knez Oborgradzki, Zlobor Magjarevich, Ljudmila.*

*Szlavoljub.*

Ha! vkanjlivec malovredni! kashtigi ne vujdesh!

*Zlobor.*

Tebe v' pekel poslati jedina josh je selja moja! (vojuju. Szlavoljub rani Zlobora, koj opadne i zkrikne.) Suhko je pred zadobljenim cilom vumreti. (vija sze.) Vragi — veszelite sze — pajdash — vash ide — ztari Lomovrat — on i ja — (komaj razumljivo.) mi szmo — krivci,

(gorko zdehne, i vumre.)

*Szlavoljub* (hiti mech, k' Ljudmili zkochi, i polek nje klekne.)

O! Angel Bosi! ako ti ne sivesh, onda zidine pnrushite sze i zakopajte mene! — duse siveti nechu! (prime ju za ruku. Veszelo.) topla je — szopi sive! sive!

### *Prizor cheterti.*

*Radbud, Boromir, Lomovrat, Szvojko i Oklopniki* (dojdu.)

*Radbud.*

Kde je dete moje? jeli sive? kde je Zlobor?

*Szlavoljub* (ztane sze, na Ljudmili pervich, onda na Zlobora kase. — Zdigne mech, i njega gledech veli.)

Pil szi kerv njegovu, sedja tvoja je vtishena.

*Radbud.*

Malovrednijaka, ruka Bosanzka doztigla je. Ali Ljudmila moja, jeli sive?

*Szlavoljub.*

Sive! sive! nego hitro pomoch prizkerete ar drugach bude keszno!

*Radbud* (k' oklopnikom.)

Tovarushicu moju dozovete!

(jeden med njimi odide.)

*Szlavoljub* (k' Ljudmili ztupi, gledi jeli josh sive, i Szvojko tam dojdechi tiho z' Szlavoljubom zpomina sze.)

*Boromir* (k' Radbudu.)

Zmosnozt Bosanzku zadozta prechuditi ne moremo, da ova dugovanja, koja tak ztrashen konec bi bila imala, szrechno zpelal je.

*Radbud.*

Zaizto njegvomu szamo za nasz zkonznujchemu oku to zahvaliti imamo.

## *Prizor četerti.*

*Ztaniszlava (dojde.) Pervejshi.*

*Ztaniszlava (chizto preztrashena dobesi.)*

Ljudmila moja! Ijubleno dete! — kde szi? jeli sivesh? (k'noj ide, nju brishe, i 'z omiljavice zbuditi terszi sze. Medtemtoga Szlavoljub vre na Ljudmilu, vre na Radbuda i Lomovrata pazi.)

### *Radbud.*

Sive, moja Ztaniszlava, i to jedino Szlavoljubu zahvaliti moresh. (k'Lomovratu) Szada ti ztarche valuj! kak obechal szi, dobrovoljno!

*Lomovrat (z' krushenim szerdcem.)*

Hochem! hochem! vsze iztinzki povi-  
ti. O! ztvoritel szveta! kak miloztiven  
jeszi! dopuztil szi meni v' zlochinih mojih  
oszedeti! puztil zemlju tzoju lepu gaziti!  
da pokoru bi vchinil — odperle szu sze  
ochi moje, vidim moje cherno szerdce, i  
hmanjochu sivlenja mojega, koje nikaj,  
kak chizlo grehov je. — Chujte anda:  
Zlobora volja bila je, jal med vami, i  
Szlavoljubom josh bolje vusgati — vashu  
keher jedino 'z pohlepnozti je hotel; od  
njega szu bili szlugi v' lozu poszlani, da  
vasz zkonchaju — krivnju pako vashega

pomora na Szlavoljuba porinuti nakanishe.  
I ja! (ruke ztezuch saloztno,) ja! ne szam  
da to vsze znal szem, nego josh z' mojim  
tolnachem mu pomagal szem! — Konec  
znate, hvala Bogu, da osznowam nashem  
ni je zpodoben. Dajte i meni szmert,  
zaizto zaszlusil szem ju.

*Radbud* (tiho pred sze gledi, onda na Ljud-  
milu gledech zpazi truplo Zlobora.)

Odneszete truplo ovoga chloveka,  
njegov pogled habi veszelje nashe!  
(Ljudmila k' szebi dojde, szedne sze, i zboch-  
ki \*) na Szlavoljuba gledi.)

### Ztanisz lava.

Ljudmila! ah zbudi sze! — kak jako  
szi me preztrashila!

*Ljudmila* (na pol tiho.)

Kde je? — on ztrashni chlovek? —  
(na Szlavoljuba gledi, njemu ruku da) Moj  
Szlavoljube! ti ovde? a moj otec? — je-  
li je mertev? — (Szlavoljub klekne, raku  
prime i kushne, za mal chasz ztane sze.)

### Ztanisz lava.

Zpomeni sze moje dete, ovde je tvoj  
otec!

\*) staar.

*Radbud.*

Drago dete! nikaj vishe sze bojati ni-mash, oszlobodjena jeszi.

*Ljudmila* (ztané sze, i k' otcu ide.)

Jeli mi budete opřoztili moj otec, ne pokornozt moju?

*Radbud.*

Nikaj od toga moja kchi, vszakomu nazlobu konec je — szamo veszelju ovde je mezto.

*Szlavoljub* (k'Szvojkü.)

Szvojko! naj lepshi mojih gradov je tvoj — osznova tvoja je k' koncu dopelana.

*Szvojko.*

Jeli koj vashih gradov tuliko vreden? kak veszelje, koje ov szat meni zavdaje.

*Szlavoljub* (rukije sze z' njim.)

Szvojko! tvoje priateljzvje je moj naj vekshi kinch.

*Radbud.*

Hodte deca dajte szi ruke, vredni zte da sze zadobite, moj blagoszlov imate.

(Ljudmile i Szlavoljuba ruke szlosi.)

*Ztaniszlava.*

I moj. Bog wasz blagoszlovi.

*Ljudmila* (k' materi.)

*Szlavoljub* (k' Radbudu.)

(zajedno.)

*Moja mati!*

*Moj otec!*

*Radbud.*

To je pervi chiztoga veszelja szat ko-  
jeg' sze vsivam!

*Szlavoljub.*

Oproztete onomu ztarcu, nepomoch-  
ljiv i zlab je, nam shkodeti vishe ne mo-  
re, — naj pokoru chini, i sive szvoje  
zbrojene dneve.

*Radbud.*

Kajti iztinzki saluje zlochine szvoje,  
naj mu bude oproztjeno.

(Lomovrat z' kretanjem hvalu szvoju pokase.)

*Prizor shezti.*

*Jela*, (doderchi z' golubom v' vruki.)

*Pervejshi.*

*Jela.*

Moramo vendar i mi dva, koji k' nji-  
hovi szrechi pomochniki bili szmo, od  
njihovog' veszelja kaj dobiti; kaj ne moj  
golub?

*Szlawoljub* (vzeme goluba i gladi ga.)

Verni ti branitel ljubavi moje, ti znamenje nekrivnozti, zpomenjek nashe ljubavi, dok sivesh, obnashal budesh.

*Jela* (k' Ljudmili.)

Kak me veszeli, tebe szrechnu videti, zrechi ne morem.

*Ljudmila.*

Vnogo tebi zahvaliti imam.

(Szlawoljub kase goluba Boromiru.)

*Boromir.*

Zaizto retki mladenci budu tak szrechni letechega liztonosza imati, njega tak lehko vlovi ti ni mochi.

*Szlawoljub* (preda goluba Jeli.)

Lepo dete, velik szem tvoj dusnik.

*Jela.*

Jednomu tak krasznomu vitezu szlusiti mochi, dozta velika je placha.

*Boromir* (k' Szlawoljubu.)

Priatel vezda vidim, da velika radozt biti mora jedno szerdee szebe iztinzki lubeche szvoje imenuvati mochi.

*Szlawoljub.*

To szamo chutiti moremo; veruj mi

netechno je sivlenje ako vugodnozt zakonkoga ztalisha i veszelje szrechnoga otca ne zkushamo.

*Radbud.*

Oztavimo ovo za nashu radozt nepri-  
ztojno mezto.

*Szlavoljub.*

Idemo! nego szveto odszad bude ovo  
mezto meni, v' kojem Ljudmila nekrivna  
terpela je, i v' kojem szrecha mojega  
sivlenja meni szvenushe. — Golub od  
vezda bude naj szvetejshi med ztvorenjmi  
zemeljkemi meni! — golub gerb knezev  
Oborgradzkeh kinchiti mora.

*Radbud* (jednu ruku Ljudmili drugu Szlavo-  
ljubu da.)

Odszad navek nerazdrusljivi!

*Zaztor opadne.*

---

— et secundum eam quae in cunctis  
— deputata est et solidate etiam  
— communione.

Audiret

magister audierat ex ovo omni-

volenti.

admonitio


ovo abinde tunc ova non tollit  
secundus omnibus in eis et cunctis eis  
supponit alia ex iuxta. Et si quis  
hunc dicit — ratione recte non possit  
inveni hunc idem ut etiam abinde  
tunc dicit — tunc inveni posse  
cum inveniatur secundum.


et res ipsa certe dicitur inde. Audiret  
et res ipsa certe dicitur inde. Audiret

et res ipsa certe dicitur inde.

magister audierat ex ovo omni-

volenti.





Österreichische Nationalbibliothek



+Z185616801

